



A lokisetse Morena Sechaba se phethehileng (Luka 1,17)

Tel: 28 350 466/ 62600983 (WhatsApp)

M5.00

MOELETSI OA BASOTHO

PARARE DOMINO PLEBEM PERFECTAM



Bo farela mabopong

2


LDTTC e matlafatsa bacha

12



LE BA LAHLA KHEREHLOA

www.moeletsioabasothe.co.ls



Re se re fumaneha ho marangrang

Email: newsroom@moeletsioabasothe.co.ls
Tel: +266 28350466/ Whats app: 62600983

MOELETSI

Lipuisano li tliša tharollo

Ha ho kamoo khalefo e ka lokisang litaba kapa hona ho fana ka tharollo, kapa ho tliša eona khotso ea moshoelella eseng ea mabele. Ho se shebele litaba 'moha ha bo-ralikoloi le 'muso, kapa ho fapana ka maikutlo, ha ho bolele hore batho ba phahamise maikutlo. Litaba tse joalo li ka luka khotso ka-har'a naha.

'Hampe kapa hantle.' Taba ee e bolelang MRTD? Kanete haeba hona le moo ho sa utloanoeng, ke hore ho luloe fatše ho rarolloe litaba, ha ho pheko ea fetang lipuisano.

Taba ea liteso tsa likoloi tsa baeti re a e ananela, empa ka tsela e hantle haholo ntlheng ea ho e atamela re ntse re ipapisite le moruo oa naha. Ha re hane 'muso o qeta ho pitla sechaba sa Basotho ka nyollo ea maliboho le ka linomoro polata tsa likoloi. Che, ea mafura ke taba e bakiloeng ke lintoa tse ntse li tsoelapele mose ho maoatlē. Re ka thohetsa hore liteso li lule li nyolloa selemo le selemo e le hore sechaba se se khahlapetsoe. Ha o sheba kahara naha ea Lesotho meputso ea basebetsi e tlaase haholo, 'me taba eo e tlišo eketsa bofuma le tšala kahara naha.

Ha se khale ha re ne re bontša hore lihoai tsa boea ba nku le poli li tlišo imona monoana ka thekiso ea boea ba bona naheng ea China, kamor'a hore moemeli oa Naha ea China a bontše hore mebaraka e butsoe naheng ea habo, 'me bana le khahleho e kholo ho boea ba Basotho.

Boea ba lihoai tsa Lesotho bo faretse mabopong ha bo lokela ho tšela. Ha utloa ho buoa ka lefu la qhommeng la tlhaku le molomo. Boea bona bo hakanyetsoe ho M10Millione ha bo rekoa 'me sena se re moruo oa naha o tlišo tloko-ma haholo. E se eka lipuisano tse ntseng li tsoelapale tsa 'Muso oa Lesotho le 'Muso oa China li ka tliša tharollo.

Feela ntho e makatsang eo re lulang re ipotsa eona, ke litaba tsa Naha ea Afrika Boroa e kileng ea ba le lona lefu lena, ampa boea ba eona bo ile ba tšela, empa ba Lesotho ke pharela. Ke ntho e bohloko ea ha Basotho ba tšameha ho fumana litsiane tsa bona kamor'a kotulo ea likhoeli tsa 12, empa joale e haba ho tse 16 ho se chelete.

Bongata ba sechaba sa Basotho bo phela ka boea, joale hona joale ke mathata feela, bana ba lelekoa likolong, malapa a apareloa ke tšala e leng se behileng ba bangata tšetsing.

Lefu ha le le teng naha e lokela ho enta liphoofole ho bona hore mafu a fumaneloa pheko eseng moriana kapa botsebi ba lekala. Sa bohlokoa ke hore naha e itlhophe ho hlola mafu a liphoofole le ho a loantša ka nako.

Bakuli ba mafu kelello ba phela mahlomoleng le maemong a sa amoheleng ka lebaka la ho se hlokomeloe ke baikarabellang. Monamoli o bontša hore sepetelele sena se na le mathata a sa feleng a ho haelloa ha basebetsi, ho senyeha ha meao, le tlhokomelo e fokolang ea bakuli.

Memo a sepetelele sena a tlaase haholo ho melao ea machaba ea litokelo tsa botho, haholo ba nang le mafu a kelello. Bakuli ba petetsane hoo ba tšoaetsanang mafu habonolo. O lemosa hore haeba ho sa nkuoe mehato e potlakileng le e matla, setsi sena se ka hloleha ho sireletsa le ho thusa batho bao se reretsoeng ho ba sebeletsa.

Molula-Setulo oa Balula-Setulo likomiting tsa paramente, o tšatsitse taba ena ka hore e hlile e'a nyarosa, ebile e beha Lesotho boemong bo fatše machabeng ka ho hatikela litokelo tsa mantšha tsa sechaba. O re boemo bona ke boo ka kotloloho 'muso o kenyang letsoho ho atisa mafu a kelello. Lintlafatso li bohlokoa, empa sechaba se kulang se loke-loa ho thusoa ka seriti le polokeho eseng se hlekefetsoe.

Maemo a ntse a mpefala litsing tsa Tšhabollo ea Batšoarua, ke tšubuhlellano e sa eng moriting. Haele phepo ke mathata feela. Maemong a bophelo bo botle ke khaello le lisebelisoa, ho kenyeletsa ho ata ha mafu. Ho tloha ha Naha ea Lesotho e fumana boipuso batšoarua ba ntse ba fuoa motoho, linooa le lierekisi letsatsi le letsatsi.

MOLIMO A BOLOKE LESOTHO LE BASOTHO

Boea bo farela mabopong

Nthabeleng Seithleko

Ho qhoma ha lefu la tlhaku le molomo ho behile bahoebi ba boea ba linku le lipoli tšetsing, kaha boea ba Lesotho bo hakanyetsoang ho feta M100Millione bo faretse mabopong ha bo lokela ho romelloa China ka le reng ngaka e lokela ho ea paka hore boea boo ha bona mafu. Litaba tse-na li tiisitsoe ke Mookameli oa Mokhatlo oa Farelane le

la 17 Hlakubele 2026, moo China e ileng ea thibela ha nakoana ho kenngoa ha lihlahisoa tsena ho tsoa Lesotho, e le mehato ea tšireletso. Leha ho le joalo, lipuisano lipakeng tsa 'Muso oa Lesotho, ka Lekala la Temo, le 'Muso oa China li ntse li tsoela pele ho batla tharollo. Embassy ea China e itse e nka taba ena ka botebo, 'me mahlakore ka bobeli a ntse a buisana hau-fi-ufi a tliša etsa tlhahlobo ea likotsi le lipuisano.

malapa a apareloa ke tšala eleng se behileng ba bangata tšetsing. "Ehlile ha ke cheche 'muso o morerong oa ho faposa boea ba Basotho ho bontša mebarakeng ea Machaba, ba il'o bo rekisa 'black market' joaloka 2019 nakong ea letona la mehlang Phori." Ke Thinyane eo.

O supile hore tebello ea bona e ne e le hore mebuso e tliša khaohana le bona, empa ho bonahala taba ea mebuso le bo-ranku linkae e



Seiboko, Mokoenihi Thinyane, puisanong le Koranta ka la 16 'Mesa monongoaha.

Kamor'a ho qhoma ha lefu lena, 'muso o ile oa phatlalatsa boemo ba tšoa-hanyetso, 'me oa kenya mehato e matla ho thibela ho ata ha lona. Har'a mehato eo ho kenyelelitsoe ho emisoa ha motsamao o sa netefatsoang oa liphoofole le lihlahisoa tsa tsona lipakeng tsa Lesotho le Afrika Boroa.

Leha ho le joalo, mehato ena e bile le tšusumetso e kholo moruong, kaha boea ba linku le lipoli bo reretsoeng ho romelloa China e leng 'marakeng o moholo oa Lesotho, bo ntse bo tšoaletsoe matlong a polokelo a boema-kepe, bo emetse tumello ea ho romelloa.

Molula-Setulo oa Mokhatlo oa Farelane le Seiboko, Mokoenihi Thinyane, o re bareki ba China ba se ba rekile lihlahisoa tsena ka likopo, empa ha ba e-s'o lefe kaha ba emetse hore thepa e romelloe.

O boetse a bontša hore China hajoale e hana ho amohela boea ba nku le poli ho tsoa Lesotho ka lebaka la matšoenyeho a lefu lena. Sena se latela tsebiso ea

Ka lehlakoreng le leng Thinyane o re mebaraka e meng e kang Europe, India le United States of Amerika e ntse e bulehile bakeng sa theko le thekiso ea boea ba Lesotho. Haholo-holo Europe e batla boleng bo holimo, 'me e lefa hantle bakeng sa lihlahisoa tse hlophisitsoeng hantle.

O hlalositse hore China hangata e reka ka bongata bo boholo ntle le ho sheba haholo boleng bo hlophisitsoeng, e leng se etsang hore e be 'maraka oa bohlokoa haholo ho bahlahisi ba naha ena.

Leha ho le joalo, o bontšitse hore leha Afrika Boroa le eona e kile ea ameha ke lefu lena, e ntse e tsoela pele ho romella lihlahisoa tsa eona China ntle le litšitso tse kholo. "Rea makala hobane Afrika Boroa le eona e tobane le lefu lena, empa lihlahisoa tsa eona li ntse li kena 'marakeng oa China ntle le mathata." Ho boletse eena.

O tsoetsepele hore ke ntho e bohloko ena, kaha Basotho ba lokela ho fumana litsiane tsa bona kamor'a kotulo ea likhoeli tse 12 empa joale e haba ho tse 16 ho se chelete. O re bana b'a lelekoa likolong,

le thata. H'a joale ho setse libale tse 60 ho hlaha sekering sa Thabang, Mokhotlong, ha boholo ba boea bo se bo rekisitsoe.

Mokhatlo oa habo o ntse o na le tšepo ea hore lipuisano tsena tsa lipolotiki li tliša hlaha tharollo e ntle, e tliša nolofatsa hore ho romelloa ha boea ba nku le poli ho tsoelepele, ho imolla khatello e ntseng e eketseha ho bahlahisi.

E mong oa lihoai Khot-sang Moshoeshe o hlalositse hore bapolotiki ba loke-la ho arohana le thepa ea bona, kaha ba iphelisa ba sa kope letho ho mang kapa mang. "Hona joale boemo bona bo re bitsetsa tšala eo re lekang ka hohle ho e thibela ka ho iphelisa ka liphoofole tsa rona." Ke Moshoeshe eo.

Lefu ha le le teng naha e lokela ho enta liphoofole, ho bona hore mafu a fumaneloa pheko, eseng meriana kapa botsebi ba lekala, ebe ha bo fumanehe. O re ho bohlokoa hore naha e itlhophele ho hlola mafu a liphoofole le ho a loantša ka nako, lebaka ke hore mafu a se ke a fetsetsanoa ke liphoofole, kaha ho se mol-emong oa Basotho ho ama moruo oa naha.

Contacts: +266 28350 466

62600983 WhatsApp

Email: newsroom@moeletsiobasotho.co.ls

Sales and Marketing: (+266) 28 350 466/ 57396597 (WhatsApp)

MOELETSI oa BASOTHO
A LOKISETSE MORENA SECHABA SE PHETHEHLENG (LUKE 1, 17)

EMAIL: editor@moeletsiobasotho.co.ls

sub-editor@moeletsiobasotho.co.ls

Mohale Lehlohonolo (Sub-editor)

(+266) 58 771 507 / 62 771 507

Journalists

Nthabeleng Seithleko

Tšelis Thakholi

Production Desk: 'Mateele Liqa

57 665 038/ 68 216 271

58 540 853/ 63 480 404

Lekala le ba lahla kherehloa

Nthabeleng Seitlheko

Monamoli Adv. Tlotliso Polaki o phatlalalitse tšalo morao ea tlaleho ea 2023, ea maemo a Setsi sa Bophelo sa Mohlomi ka la 14 'Mesa monongoaha.

O nyatsitse ka matla boemo ba Sepetlele sa Mafu a kelello sa Mohlomi, a bontša hore bakuli ba phela mahlomoleng le maemong a sa amoheleheng, ka lebaka la ho se hlokomeloe ke baikarabellang.

H'a hlahisa liphuputso tsa tlhahlobo e entsoeng hape, Adv. Polaki o hlalositse setšoantšo se bohloko sa sepetlele se nang le mathata a sa feleng a ho ho senyeha ha meaho, le tlhokomelo e fokolang ea bakuli.

O boletse hore e 'ngoe ea mathata a maholo ke khaello ea basebetsi ba litsebo tse ikhethang, ho kenyeletsoa 'occupational therapist', hammoho le ho se be teng ha ngaka ea mafu a kelello ea nako tsohle, e leng se fokotsang bokhoni ba sepetlele ho fana ka litšebeletso tse loketseng.

Adv. Polaki o totobalitse hore liphuputso li bontša tsamaiso e nang le ho se tsamaiso litaba hantle moo mathata a neng a se a supiloa pele a sa lokisoa, empa a ntse a mpefala le ho feta. O itse sena se bontša mokhoa oa ho se tsotelle o seng o metse ka metso.

O boetse a bontša ho tsoenyeha ka tlaleho ea tsoaetsano e ntseng e ata har'a bakuli ka lebaka la ho petetsana, a re boemo bona b'a tšosa ebile ha bo amohelehe.

O hatelletse hore maemo a sepetlele a katlaase haholo ho melao ea machaba ea litokelo tsa botho, haholo-holo ho batho ba nang le mafu a kelello.

Ho ea ka Monamoli, litlathiso tse 97 tse neng li fuoe 'muso pele, ke 12 feela tse ileng tsa phethahatsoa ka botlalo, e leng se hlahisang lipotso tse ngata mabapi le boikarabelo le boitlamo ba ntlafatso.

O boetse a re Lekala la Bophelo le hlolehile ho kenya tšebetsong mehato ea bohlokoa e neng e reretsoe ho ntlafatsa maemo a bakuli, leha ho bile le likopo tse pheta-phetoang tsa hore ho

nkoie bohato ka potlako.

Sepetlele sa Mohlomi ke sepetlele se seholo sa sechaba sa mafu a kelello Lesotho, e ntse e le setsi sa mantlha sa bakuli ba nang le mathata a kang khatello ea maikutlo le mafu a matla a kelello.

Leha ho le joalo, Monamoli o lemosa hore haeba ho sa nkuoe mehato e potlakileng le e matla, setsi sena se ka hloleha ho sireletsa le ho thusa batho bao se reretsoeng ho ba sebeletsa.

Tlaleho e tsoetsepele hore ho tloha ka 2016/2017, sepetlele se qetile lilemo tse ka bang 9 se sena ngaka, ka 2025 ho ile ha fihla ngaka e tsoang naheng ea Cuba.

Ngaka eo e sebetsa ka tumellano ea tšebetso ea nakoana, ha e fumane pen-shene, e boetse e tobane le mathata a puo kaha e tlameha ho ithuta Senyemane hore e tle atlehe ho hlahloba bakuli. Ka selemo se le seng e thusitse bakuli ba ka tlaase ho ba bahlano feela.

Ho feta moo, likomiti tsa molao tse lokelang ho hlahloba bakuli, ha li sa sebetsa ho tloha ka 2015, kaha ha lia nchafaletsa li-

tumellano tsa tšebetso ho tloha ka 2012. Bakuli ba koaletsoe ntle le tlhahlobo ea molao, ho se sebetse ha mekhoha ena ho entse hore bakuli ba folileng ba lule ba koaletsoe ka nako e sa lekanyetsoang, ntle le tlhahlobo ea lekhotla.

Ho tlalehiloe hore mokuli e mong o se a qetile lilemo tse 28 a koaletsoe ka lebaka la tlolo ea molao ea lilemo tse fetileng. E mong o se a qetile lilemo tse 9 a le teng le hoja a se a tsitsitse. Sena se hlaloso e le ho koaloo ntle le nyeoe e ncha, se ka nkoang e le khatikelo ea Litokelo tsa Mantlha tsa Botho.

'Forensic' e reretsoe ho nka bakuli ba 35, hona joale e na le bakuli ba 84, e leng 240% ea bokhoni ba eona. Ka kakaretso sepetlele se na le bakuli ba 154 ha se reretsoe ho se fete 110.

Sena se etsa hore bakuli ba robale fatše holim'a materase, likamore li tletse haholo, mafu a tsoaetsanoang a hasane (TB, scabies, HIV/AIDS, mafu a phekumoloho). Bakuli ba bang ba folileng ba qobelloa ho lula le ba bang ba sa foleng, 'me seo se ka baka ho khutla ha mafu.

E mong oa basebetsi setsing sena ebile e le mooki, eo koranta e nang le mabitso a hae, o hlalositse hore ba sebeletsa bakuli ba imetsoeng hoo, ho bile hona le khaello ea lithare. Ba bang baa fola ba be ba kule hape, joale ba tsoang ka Litsing tsa Tlhabollo ea Batšoaruo bona ke sono kaha ba nka nako e telele. "Bophelo ba batho bo tlokotsing le palo ea bona e holimo, joale re sebetsana le mafu a kelello hobane ngaka e 'ngoe eo eleng setsebi." Ke eena eo.

O re hona le mafu a phamoletsoeng holimo, lena la kelello naha e lebetse ka bakuli ba lona le hoja tšebeliso ea lithetefatsi e phahame. 'Muso o lokela ho sisinyeha kaha le likobo, liaparo le lijo e le bothata. Bakuli ba lefu lena ba phela mahlomoleng.

E mong oa bakuli ba bileng setsing sena ho ea kopa litšebeletso, Thato Lenka, o hlalositse hore a ke ke a hlola a boela setsing seo hobane hoa tšosa, ha hona polokeho ea letho. O re motho ea ileng setsing seno o khutla a kula ho feta. A re o ipiletsa ho lekala ho ela setsi sena hloko, kaha le litlhare li na le ho haella.

Molula-Setulo oa Balula-Setulo ba Likomiti tsa Paramente Mohlomphehi Mokhotu Makhallanyane o hlalositse hore tlaleho ena ke e nyarolang, e bontša le

ho beha Lesotho boemong bo fatše machabeng ka ho hatikela litokelo tsa mantlha tsa sechaba. O re boemo bona ke boo ka kotloloho 'muso ka bo ona o kenyang letsoho ho atisa mafu a kelello. "Re kile ra etela setsi sena, ha re ea ka ra khutlela lekhetlo la bobeli hobane ehlile boemo e le bo sisimosang." Ke Makhallanyane eo.

Lintlafatso li bohlokoa empa sechaba se kulang se lokela ho thusoa ka seriti le polokeho eseng se hlekefetsoe. O re ho latela tlaleho e fetileng le litaba tseo ho neng ho lebeletsoe lekala le li phethahatse, ha ho e-so phethahatsoe 91% ea tsona ho fihlela a etsa tlhahlobo ena ea bobeli.

Tabeng ea hore ba lutse tlaleho ena holimo ha ba e-s'o e fetisi leho e tšohla ka paramenteng, o re bothata bo boholo ke taba ea tsamaiso ea mekha le makhotla a lipolotiki a sa eleng hloko litaba tse potlakileng kaha e sa ka ea ananeloa.

O re leha ho le joalo, ba tla bitsa Lekala la Bophelo haufinyane ho tla utloa litaba tseena, 'me tebello ea bona ke hore bakuli bao ba fuoe kalafo e nepahetseng. Lintho tseena li hlabisa lihlong kaha re le naha e ratang ho hlaha mahlong a machaba re le betere ho se joalo.

Mafu a sa tšehetsoeng ke bafani Lekala la Bophelo le lona le ea a nyahlatsa, ho bolela hore ha hona mang kapa mang ea tsietsing ea tahlehelo ea bophelo ba batho ke mafu ao e leng qholotso kahar'a sechaba a hloka tšehetso ea lichelete.

"Ke bona eka Lesotho le ntse le tetebela hoo ka matsatsi a mang ho tla a tleha feela ba nang le bokhoni, ba se nang bona ba ke ke ba atleha ha feela ho sa tsotelloe litaba tsa mofuta ona." ke Mokhotu eo.

Tlaleho ea morao-rao ea Mokhatlo oa Lefatše oa Bophelo (WHO) ea 'Mesa 2024' tlas'a sehlooho sa Mental Health Atlas le lipalo-palo tsa morao-rao li bontša hore mathata a bophelo ba kelello a se a atile haholo lefatšeng.

12.5% eleng motho a le mong ho batho ba 8 lefatšeng ba phela le bothata ba kelello. 19% ho motho a le mong ho ba 5 ba kile ba fumanoa ba e-na le ho sibathela ha maikutlo bopheleng ba bona.

Linaha tse fetang 70% li ntse li haelloa ke basebetsi ba kelello (psychiatrists, psychologists). Lichelete tsa bophelo ba kelello li ntse li le tlase, 2% feela chelete ea bophelo bo botle linaheng tse ngata.

Phepo e imela 'muso



Nthabeleng Seitlheko

Tlalehong ea morao-rao ea tlhahlobo ea Litsi tsa Tlhabollo ea Batšoaruo eo eleng tšalo morao ea tlaleho ea selemo sa 2023, Monamoli Adv. Tlotliso Polaki, o bontšitse hore maemo a mpefetsa ho feta kamoo a neng a le kateng pejana ka litsing. O boletse tsona ka la 14 'Mesa monongoaha.

O itse ho ile ha etsoa litlathiso tse 78, empa ha ho le e le 'ngoe e seng e phethiloe ka botlalo. Ho na le tsoelo-pele e nyenyane feela libakeng tse robeli, ha karolo e ka bang 91% ea litlathiso e sa ka ea tsotelloa ho hang.

Adv. Polaki o bontšitse hore bothata ba ho tla ha-

hlo ha batšoaruo bo ntse bo mpefala, palo ea bona e nyoloha ho tloha ho 1 835 ka 2023 ho fihla ho 2 757 ka Hlakubele selemong sena.

Chankana e kholo ea Maseru (MCCI), e reretsoeng ho amohela batšoaruo ba 500 feela, hajoale e tšore ba 971, e leng ho feta tekanyo ka 149%. O itse litsi halofo ea litsi e tletse haholo, tse ling li tšoare lenane le fetang habeli kapa hararo ho feta bokhoni ba tsona.

Ho feta moo, meaho ea litsi tseena e ntse e senyeha. Litsi tse kang Berea, Quthing, Qacha's Nek, Maseru Female le Juvenile Training Centre li ntse li sebelisoa, leha litsibi tsa meaho li kile tsa re ha lia tšoaanela ho lula batho.

O ile a boela a nyatsa tloaelo ea ho se nke boikarabelo kahar'a litšebeletso

tse chankana, moo basebetsi ba qosoang ka ho hlekefetsa batšoaruo ka Tšitoe 2023, ba sa kang ba ahloloa. Tlaleho e bontšitse hore ho bile le ho patoa ha bopaki, ho hana kalafo le mekhoha e sa lokang, empa ho fihlela joale ha ho na motho ea nkileng mehato.

O boetse a supa hore tsamaiso ea toka e baka bothata bo boholo, kaha batšoaruo ba emetseng linyeoe ba etsa 31% ea palo eohle. Ba bang ba qeta lilemo tse fetang tse robeli ba sa ahloloa, e leng tlolo e tebileng ea Molao oa Motheo.

Maemong a bophelo bo botle, o itse ho na le khaello e kholo ea litšebeletso, ho kenyeletsa ho ata ha mafu a kang lefu la poone (Mafeteng), 'scabies' le lefuba. Lijo tse lokelang ho fuoa batšoaruo ha lia ka tsa lateloa ho tloha boipusong ba Lesotho, ba ntse ba fuoa motoho le linaoa kapa lierekisi letsatsi le letsatsi.

Adv. Polaki o ile a phethela ka hore ho hloleha hona ha 'muso ha se feela ho se sebetse hantle, empa ke tlolo e tsoelang pele ea Molao oa Motheo le melao ea machaba ea litokelo tsa botho.

O entse temoso hore haeba mehato e sa nkuoe hang-hang, ho ka 'na ha e-ba le mehato ea molao kapa likotlo tsa machaba khahlanong le Lesotho.

MOELETSI O TŠEHETSA BACHA

Tšeliso Thakholi

Bacha ba banga-ta ba hloma e ka ha ba qeta ho phethela lithuto tsa bona likolong tse fapakaneng tsa thuto e phahameng kapa mesebetsi ea matsoho ba lokela hoba le chelete e ngata hore ba tsebe ho qala likhoebo tsa bona le ho li tsebahatsa. Athe ha ho joalo. Motho a ka qala khoebo ka chelete e ka tlaase ho M1,500.00 ho ipapisitsoe le hore na ke ea mofuta ofe. Mofumahatsana Kekeletso Mosiane, o qalile khoebo ea ho etsa batho botle ka li-makeup, ho kenya lintši le ho lokisa manala ka chelete e kaalo ka M1,000.00, kamor'a ho fumana koetliso sekolong sa mesebetsi ea matsoho sa Cograbig Institute of Arts ka 2024.

QALEHO

Ke qalile khoebo ena ka Pherekhong selemong sa 2025, ha ke qeta ho phethela lithuto tsa ka. Ke ne ke sebetsa khoebong e 'ngoe e bitsoang Lovely Rock Hair Salon & Cosmetics, e ntse e le nyenyane haholo e sa tsoa qala, 'me moo ke ne ke shebane haholo le ho kenya lintši le ho lokisa manala feela. Ke hona moo ke ileng ka ithuta lintho tse ngata haholo mabapi le litaba tsa ho tsamaisa le ho holisa khoebo. Ke ne ke fumana moputso o tlaase haholo, empa ka ithuta hore le ka seo ke nang le sona nka



iqalla khoebo.

Hang ha ho buloa moaho o mocha o tlas'a selika-likoe se sehlo sa Maseru, ke ile ka utloa ke khahloa ke ho ea iqalla khoebo ea ka. Morero e ne e le hore batho ha ba ntse ba tla mabenkeleng nakong eo ba tllil'o reka, e bonahale batho ba e tsebe hore na e fumaneha ho kae. Ka lebaka la maemo a litefiso tsa ho hira moaho tse boima, hang ha batho ba se ba e tseba, re ile ra tsoa moo, re se re fumaneha motseng oa Seapoint kahar'a toropo e kholo ea Maseru.

Re boetse re etelang batho metseng, malapeng, liofising le moo ba sebetsang teng, ho tla ba etsa botle ba mofuta eohle. Re lokisa le batho bakeng sa mekete e meholo ea machato, mafule e meng e mengata. Re boetse hape re eletsa batho hore ba sebelise me-

khabiso e joang ho latela mofuta ea mekete eo ba eang ho eona.

TŠUSUMETSO

Ntho e kholo e ileng ea ntšusumetsa hore ke qetelle ke qalile khoebo ena ke lerato leo ke nang le lona la ho iqalla khoebo eo e leng ea ka, molemong oa hore ke tle ke tsebe ho phela le ho phelisa ba bang. E kholo ka ho fetisisa ha ke motho ea ratang haholo ho hiroa, empa ke rata ho itšoarella ka matsoho le ho sebelisa litalenta tseo ke nang le tsona. Ho feta mona morero e ntse e le ho loantša tlhokahalo ea mesebetsi kahar'a rona re le bacha.

Ha ngata Lesotho mona motho h'a sheba, batho re rata ho etsisana, haholo-

lo-holo litabeng tsa khoebo. 'Na ke ile ka ithuta sebaka sa Seapoint hore ke khoebo ea mofuta ofe e ka atlehang. Ka hlokomelela hore ke ena ea ho etsa batho botle, ho kenya lintši le manala. Morao tjena ke se ke butse lekalana mane Khubetsoana moo re lohang le ho kuta moriri. Ka litsebo tseo ke nang le tsona, tseo ke ntseng ke batla ho li eketsa ka ho ea etsa Lengolo la Khoebo la Diploma ke batla ke ena le leseli la khoebo.

KHOLO LE LIQHOLOTSO

Liqholotso tsona ke karo ea bophelo ha ho moo li leng sieo. Ka 'nete qalong liqholotso tsona li bile teng empa e se tse mpe haholo-

lo. Tse kang tsa ho lieha ha thepa le baji ba lihlahisoa tsa rona ba tlabeng ba re bitsa ho ea ba kenya manala libakeng tseo ba leng ho tsona, e re ha re fihla re fumane ba se ba koetse lifono ba sa fumanehe, 'me ka lehlohonolo litaba tseo re ile ra li hlola. E kholo haholo e ntseng e re sokolisa le kajeno ke ea basebetsi ba rona ba itokollang kahare ho nako ha ba qeta ho fumana meputso ea bona. Bona bothata re se re le mothating oa ho bona hore re tla bohlola joang, kaha re hlokometse hore basebetsi ba rona ha ba e-s'o utloisisi seo ba se batlang e se hobane ba sa tsebe mosebetsi.

Leha ho le joalo, ho bonahala kholo mosebetsing oa rona, 'me Basotho ba se ba utloisisa hore ha ba ea meteteng ka ho fapakana le ha ba ntse ba le malapeng, mesebetsing le mabakeng a bona ka ho fapakana ba lokela ho ba be batle.

KELETSO

Bacha ba lokela ho ema fatše ho iketsetsa mesebetsi hobane joale ho'a bonahala hore ha ho mesebetsi. Ka 'nete ha se boikarabello ba 'muso feela le bacha ba lokela hore ba nke boikarabello, hore ba itl'hahisetse mesebetsi ka litsebo tseo ba nang le tsona tsa mahlale a thuto le tseo e leng tsa bohlale ba kelello.

KHOELEHETSO HO BACHA

Re kopa bacha bohle ba khoebong, tse ntseng li thuthuha le tse seng li iphumane ba bue le Moeletsi oa Basotho ho:

newsroom@moeletsiobasotho.co.ls

kapa nomorong ea WhatsApp ea +266 62600983 ho arolelana le bacha ba bang ba nang le khahleho ea ho qala

khoebo, empa ba sa tsebe ba ka qala joang.



SADC bopa sehlopha

Nthabeleng Seitlheko

Ka sepheo sa ho matlafatsa puso ea sechaba ka sechaba tikolohong ea Afrika Boroa, SADC e tšoare koetliso ea boemo bo holimo bakeng sa bankakarolo ba likhetho tlas'a Morero oa Electoral Observation Missions (SEOMs) e qalileng ka la 13 'Mesa monongoaha.

Koetliso ena ea beke kaofela, e reretsoe ho hlorella ba-nka-karolo ka litsebo tse tsoetseng pele mabapi le ho shebella likhetho, haholo-holo ka ho sebelisa mekhoha ea morao-rao ea marang-rang ea tlhahiso-leseling le puisano

H'a bula semmuso koetliso ena, Mookameli oa Lekala la Litaba tsa Kantle le Likamano tsa Machaba, Limpho Masilo Motsamai, o hlalositse koetliso ena e le mohato oa bohlokoa haholo boitlamong ba Lesotho ba ho matlafatsa puso ea sechaba ka sechaba kahar'a naha le tikolohong ka bophara.

O bontšitse kananelo ho Bongoli ba SADC ka ho khetha Lesotho ho amohela koetliso ena, a re monyetla ona o bontša tšepo e ntseng e hola eo naha e e fuoang mabapi le ho khotlaletsa puso e ntle ea puso ea sechaba ka sechaba.

O hatelletse karolo ea bohlokoa eo mekhatlo ea

ho shebella likhetho e e balang ho netefatsa hore likhetho li lokolohile, li hlakile ebile li tšepahala linaheng tseo e leng litho tsa SADC. Ho ea ka eena mekhatlo ena e hlahloba hore likhetho li latela melao-theo ea puso ea sechaba ka sechaba, hape e khotlaletsa khotso, botsitso le botšephehi tšebetso ea likhetho. "Likhetho ke motheo oa tsamaiso efe kapa efe ea puso ea sechaba ka sechaba, kaha li netefatsa hore litaba-tabelo tsa batho li fetoleloa pusong." O boletse joalo.

O boletse a hlalosa hore koetliso ena e tla eketsa palo ea bahlahlobi ba likhetho ba nang le litsebo tikolohong ea SADC, ho netefatsa hore linaha li na le sehlopha se ikemiselitseng le se koetlisitsoeng hantle se ka romelloang ho shebella likhetho ha ho hloka hahala.

"Ke ka ho ba le sehlopha se sehlo sa bahlahlobi ba likhetho ba koetlisitsoeng hantle, ba nang le bokhoni le ba loketseng ho romelloa, moo SADC Electoral Observation Mission e tla khona ho phetha mosebetsi oa eona ka katleho." O boletse joalo.

O ile a boela a etsa hopotso ka leeto la puso ea sechaba ka sechaba la Lesotho ho tloha ha naha e khutlela pusong ea mekha e mengata ka likhetho tsa 1993. O lumetse hore likhetho tsa pele li ne li tsamaea le likhohlano, empa o itse naha e se e e-na le khatelo-pele e bonahalang lilemong tsa morao tjena.

"Lesotho lilemong tsa morao tjena le bone tokoloho ea likhetho e nang le khotso, ho kenyeletsoa phe-toho ea matla ka khotso ho tloha pusong e 'ngoe ho ea ho e 'ngoe." O boletse joalo. O boletse a re mekhatlo e shebella likhetho e se e ntle e fana ka litlaleho tse ntle ka

tse bohlokoa ba koetliso ena ho matlafatsa bokhoni ba ho shebella likhetho tikolohong. O hlalositse hore lenaneo lena le hlophisitsoe ke Bongoli ba SADC, SEAC, Electoral Institute for Sustainable Democracy in Africa (EISA) le Lekala la Litaba tsa Kantle le Likama-

lenaneo le tla kenyeletsa lihloho tse fapakaneng tse kang tsamaiso ea likhetho, mekhoha ea likhetho tikolohong, pokello ea lintlha, le ho shebella likhetho nakong ea maemo a tšohanyetso a bophelo bo botle joalo ka COVID-19.

Ho phaella moo ba-nka-



likhetho tsa Lesotho, e leng se behang naha e le mohala o ka lateloang tikolohong.

Setho sa SADC Electoral Advisory Council se emetseng Lesotho, Limakatso Mokhothu, o hatelle-

no tsa Machaba. O boletse hore ba-nka-karolo ba tla rutoa ka melao le melaoana e laolang SEOMs, hammoho le mesebetsi le boikarabelo ba bahlahlobi ba likhetho.

O boletse a hlalosa hore

karolo ba tla rutoa ka lisebelisoa tsa morao-rao tsa ICT, ho kenyeletsoa tšebeliso ea matlapa bakeng sa pokello ea lintlha le ho romela tlhahiso-leseling ka nako ea 'nete.

Mookameli oa Elections and Governance tlas'a SADC Organ on Politics, Defence and Security Affairs, Magabolle Mafiri o hlalositse hore koetliso ena ke karolo ea boiteko ba ho matlafatsa puso ea sechaba ka sechaba le puso e ntle tikolohong.

O boletse hore ho ntse ho hloka hahala ho eketsa bokhoni ba bahlahlobi ba likhetho ba ka romelloang linaheng tse tla tšoa likhetho. O boletse a hatisa hore le hoja ho shebella likhetho ho hloka litšenyehelo tse phahameng, ke mokhoa oa bohlokoa oa ho boloka puso ea sechaba ka sechaba.

Koetliso ena e lebeletsoe ho hlalisa sehlopha se sehlo sa bahlahlobi ba likhetho ba nang le litsebo tse tla romelloa linaheng tsa SADC, ho netefatsa likhetho tse lokolohileng tse hlakileng le tse tšepahalang.



Bo sa reroang ke qholotso



Nthabeleng Seitlheko

E mong oa baroetsana ea li 17 oa Mapholaneng, eo koranta e nang le mabitso a hae, o re o ikoahlaea kamehla ke ho nyaloa a le tlaase lilemong, kaha ketsahalo eo e ntse hore a nyahlatse sekolo ka lehare a nke boikarabello kholisong ea bana le tlhokomelong ea lelapa. O buile tsena ka la 14 'Mesa monongoaha.

"Ke na le bana ba babeli, ea lilemo li 3 le ea nang le selemo, moshanyana le ngoanana, ntate oa bona ke molisana, 'na ke phela ka ho etsa mesebetsi ea khiro ea nakoana metseng." A hlalosa joana.

O re leha a ka leka ho khutlela sekolong o'a sitoa hobane batsoali ba hae 'moho le molekane oa hae ba ne ba hloka hae, ha ana mothusi. "Ha ke nyaloa ke shobelisitsoe, hape ke ne ke se ke le 'meleng, ke baleha hore rakhali oa ka o t'lo nchapa kapa ho nteleka." Ke eena eo. Ho nyaloa o le monyenyanane ke ho itlheketsa kaha o lokela ho nka boikarabello o le lilemont tse tlaase haholo.

Ho bohlokoa hore bana ba se ke ba khahloa ke none e feta le ho kena likamanong tsa lerato ba le banyenyane, kapa ka khopolo ea hore ke hona moo pholoho e leng hona teng. O re taba eo e baka bolutu bophelong ba bona.

Leha ho le joalo, o thoholelitse baoki ba Setsi sa Bophelo Mapholaneng ka tšehetso ea bona e sa thekeseleng, ka ho mo ruta mekhoha e bolokehileng hore a sireletsehe nakong ena ea leeto la hae le boima. O re hore ba phele, ba fumana thuso ea lijo khoeli le khoeli

ho tsoa ho 'Musi oa setereke sa habo.

Ho le joalo, o khothalelitse bacha ho ea litsing tsa bophelo ho fumana tataiso ka mekhoha e nepahetseng ea ho sireletseha khahlanong le bokhachane bo sa reroang, kaha thuso e le teng, khaello e le tsebo le tšabo.

"Hajoale nkebe ka hlola ke etsa phoso e tšoanang ea ho senya bophelo ba ka ke etsa bana, empa ke tla leba setsing ho fumana thuso hore ke sireletsehe, le bana ba ka ke tla ba fa thuto kaha ke lakatsa ba tle ba be le bokamoso bo chabileng" Ke eena eo a sithabetse maikutlo.

Rakhali oa moroetsana enoa, 'Malebamang Letšolo, o hlalositse hore moroetsana o na le bana babo ba bane, ba holisoa ke eena. O re eo o ne a kena Sekolo se Phahameng sa Mapholaneng a lefelloa ke 'muso, o ile a thetseha maikutlo ha utloa hore eo o shobetse ebile o 'meleng. "Ha nkaba ka mo lata hobane o ikhethetse, etsoe le 'na ke imetsoe ke ho ba holisa, kaha ke na le bana bao eleng ba ka, ba bane, ho bolelang hore ke holisa bana ba robeli." ke Letšolo eo.

A re ke bothata bo bohlo mentseng oa habo ke ba bana ba nyaloang ba le banyenyane, ekare bana b'a eletsanang kaha bohlo banyahlatsa sekolo ka lehare, eba batsoali kapa bashanyana ba ea Afrika Boroa kapa b'a lisa. O re taba ena e bohloko kaha bana ba holisa bana ba bang. "Na ke bolella banana ba ka hore ba ee setsing ho bua le baoki ho ba fa malebela a ho itšereletsa, empa h'a bonahala hore esale ke polela letlapeng."

A tšoelapele hore o sitoa

ho thusa eo ka bana hore a khutlele sekolong hobane le eena o lokela ho sokolela bana ba hae, o lokela ho nka boikarabello a tsebe ho ithuta bophelo. O re eena o rata ho bona bana ba hae ba rutehile, empa ho bonahala ba potlakela bophelo boo eseng ba bona.

Khaello ea thuto baneng ke qholotso e kholo. O re h'a ka a tlaleha sepoleseng ha ngoana a se a nyetsoe hobane a tseba hore eo o t'lo khutlela moo, kaha a kile a nyaloa khalenyana a latoa empa joale o khutletse hape. Hona ho bontša boikemisetso e seng ho hong.

E mong 'Mamolise Ralethoko, eo eleng mosebeletsi oa bophelo motseng oa Mapholaneng, o re taba ea bokhachane bo sa roang baneng ba lilemo li 14 ho ea holimo ke koboanela, lenyalo la bana ba tlaase lilemong le bana ba nyahlatsang sekolo ka lehare e le bahlangana ho ea ba balisana ke bothata

likolong ho ba fa thuto hore ba itšireletse joang, empa litaba tseo li bonahala li sa utloahale. O re ho tloha ka khoeli ea Pherekhong selemong se holimo, ho fihlela ha joale, o na le lethathamo la baroetsana ba 7 bao eleng baimana ho hlahla metseng e fapakaneng. "Re leka mekhoha eohle ho fetisa thuto le ho ba ruta ho tlaleha sepoleseng, empa ha ba natse litaba tsena, leha likolong hona le likomiti tsa baithuti ho ka fana ka thuso ho ba bang ke bothata" ke eena eo.

Hantle re tsoere bothata, ha re tsebe re nka eng re e kopanya le eng, kaha bothata bo bong e le ba bana ba etsetsoang bana ke bontate ba mekonteraka banang le chelete. A re bana ba bang ka lebaka la bohloki bo tjametseng malapa a bo bona, eba mahlatsipa, kaha ba iphelisa ka ho kena likamanong tsa lerato le batho ba baholo. O re leha qholotso eo e le teng, empa ba bang ba baroetsana bana ba ntse ba tsoelapele ka sekolo, ha ba bang ba se nyahlatsa hobane ba hloka botšehetsi.

E mong oa litichere 'Malemaloana Monaheng, Sekolong sa Mathomo sa Mapholaneng, o re ba tjamelane le bothata bo boholo ba bana bao eleng bakhachane, ba bollang ebe ha ba khutlele sekolong, empa ba bang b'a khutla. O re bana ha ba na thahasello ea lintho tse ba thusang ho sireletseha khahlanong le bokhachane bo sa reroang le ho ila thobalano. "Leha bana ba ntse ba fuoa thuto ea bohlale ba bophelo, ha ba e nkele hloohong." Aria-lo Monaheng. O re e 'ngoe

bonahala ba ena le lenyora la thuto, ba feta khafetsa sekolong hoo ba qetellang ba hlekefetsa bana ba bang.

H'a phethela o re lipalo tsa baithuti li ntse li theoha likolong tsa mathomo, ka lebaka la maemo ana. A re ho hloka hloka mapolesa a nke likhato tse matla ho batsoali, hobane hona le batsoali ba kenyang letsoho liketsong tsena. "Rena le moithuti ea ileng a latoa ke sepolesana se a nyetsoe, kamor'a hore re utloe ra tlaleha taba ena re le sekolo ngoana a latoa, kaha batsoali ba ne ba kentse letsoho, ba nkeloa likhato tsa molao."

E mong oa baoki Setsing sa Bophelo sa Malingoaneng, eo koranta e nang le mabitso a hae, o tiisitse hore bokhachane bo sa roang baneng ba lilemo li 14 ho ea holimo bo phahame, ba fumane hore qholotso ke ho kena likamanong tsa lerato le batho ba baholo, le mekonteraka.

Ba bang ba khaneloa boemong bona ke tlala le bofuma bo tjametseng malapa, le bana ba banana ba ikholisang le ho holisa ba bang. O re ho hlola boemo bona ba etela baithuti likolong ho ba fa thuto hore ba ithokomele joang, haholo ho ba khothaletsa ho nena thobalano lilemong tse tlaase le ho itšireletsa. "Leha ho le joalo, ho na le bana ba ithokomelang ka ho etela setsing khafetsa ho fumantšoa thuto le ho sireletseha, ho ba hlekefetsoang re nka likhato tsa molao." ke eena eo.

O re litaba tsena lina le litlamorao bophelong ba bona kaha motho a ka lahlehela ke bophelo kapa ho ameha bophelong ba



bo boholo.

O re ba etsa lipitso khafetsa le bacha, le ho ba etela

e bohloko ke ea bana bao e bang balisana, ba hirisitsoe ke batsoali empa ba

(Sheba qephe la 7)

(Li tsoa qepheng la 6)

hae. O ipiletsa ho batsoali, baholisi le bahlokomeli ba bana ho qoqa le bana ba bona ba baroetsana ka litaba tsena, hore bana ba be le tsebo e tla ba thusa ho etsa liqeto tse nepahetseng.

Morena oa sebaka, Semphe 'Mei, o re ba tobane ke qholotso e kholo ea bana ba nyaloang le bao e bang bakhachane ba le hirisoang ba le tlaase lilemong. O re leha ba leka ho bua le sechaba, ho bonahala ho ena le batsoali ba ikoalang litsebe, ka ho khothaletsa litaba tsena, haholo ho hirisa bana le ho ba nyalisa. "Hona selemong se fetileng rena le mosali le monna ba ntseng ba le litlamong tsa sepolesa hobane ba ne ba nyalisitse ngoana oa bona ka lebaka la maruo." Ke 'Mei eo.

Morena o re o lomme bebebe ho tsoarisa batsoali ba etsang liketso tsena tse mpe tsa ho senyetsa bana bokamoso le ho se ba sireletse. Tabeng ea bokhachane bo sa reroang ke bana ba khahloang, kaha ba fua thuto khafetsa, le metseng b'a kopangoa ho thakeloa ka malebela. "Hantle ntho e re baketseng bolutu bo bohlo ke tla le tlhokahalo ea mesebetsi malapeng, bana ba inehelang mekonteraka e sebetsang khahong ea letamo la Polihali hobane ba fua chelete." Ke 'Mei eo. O tsoetsepele hore lihlopha tse ngata li fana ka thuto empa e le bana ba sa mameleng, empa ha ba na ho khathala matla ba tla lula ba bona hore tšireletso, polekeho le kholo e ntle ea bana eba taba e ka sehlohong.

E mong oa mahokela Samonyane Seate, o hlalositse hore ba etsa mesebetsi oa ho sireletsa litokelo tsa mantlha tsa bana, empa taba ea bokhachane bo sa reroang ke boikhethele ba bana, kaha ba khalemeloa kamehla le ho tsoareloa lithupelo ba thakeloa ka malebela a ho ipaballa le ho itšireletsa, empa ba bang ha ba natse likeletso tseo.

A re tabeng ea tšebeliso e mpe ea bana ba bashanyana le khiriso ea bona, b'a ba lata metebong le ho nkela batsoali le baholisi kapa ba hlokomeli likhato tsa molao. A re esale ba sebetsana le taba tsena ke bonyane bana ba 14 ba seng ba khutletse sekolong bao e neng e le balisana ba hirisitsoe ke batsoali kapa ba hlokomeli. O re ho bonahala kholo kahar'a sechaba, batho ba se ba atleha ho tlaaha liketsahalo tsa tlhekefetso, le moo ba bonang bana

ba sa sireletseha. "Bana ba tlokotsing ke likhutsana le bao batsoali ba bona ba sa sebetseng kahar'a naha, kaha b'a hlekefetsoa, empa re nka likhato kaha re sebetsa 'moho le sepolesa."

Mokhethoa oa Malingoaneng Ramakalima Monethi, o tiisitse litaba tsena ka le reng bana ba baroetsana ba bonahala ba eba le bokhachane bo sa reroang lilemong tse tlaase, ho hlola bothata bona o thehile lihlopha motseng tsa lipapali ho khobokanya bacha 'moho, hore ba etse mesebetsi ea boithapallo le ho lula ba tsoareloa lithupelo. Moo ba fumanang ngoana a hlekefetsoa kapa a hirisitsoe metebong ba nka likhato tsa molao.

O re lihlopha tsena li entse hore bana ba be le seo ba se etsang ka matsatsi a phomolo ho leka ho ba pholosa maemong ana a hloabaetsang. A re taba

nepahetseng. A re o boetse o sebetsa ka thata ho bona hore bao ba tsoareloa lipitso khafetsa ho fua boeletsi 'moho le balisana.

Ka lehlakoreng le leng Letona la Thuto le Koetliso, Mohlomphehi Ntoi Rapapa, o khalemme ka matla lenyalo la bana ba tlaase lilemong, hore bana ba bashanyana ba se ke ba lisa ba le tlaase lilemong, le hore bana ba banana ba ileng ba e-ba le bana ba le tlaase lilemong, ba khutlele likolong.

O re taba ena e thusa hore ho be le sechaba se nang le boikemelo, se tsebang litokelo tsa sona ebile se tseba ho bala le ho ngola. O bile o ipiletsa ho batho bohle ho tlaaha moo ba bonang liketsahalo tsena sepoleseng le ho fana ka menyenyetsi. "Litichere li lokolle bana ba kene sekolo ba ntse ba le 'meleng, ha nako ea ho itšihlolla e fihla ba ee phomolong, ba boele



ena ea bokhachane e bonahala e otlala haholo bana bao eleng ba likhutsana le bao bofuma bo aparetseng malapa a bo bona, hobane mekonteraka e ba fa chelete hore ba fihlele litlhoko tsa bona.

"Ho fetola sena ke fana ka lisebelisoa tsa bohloeki ho bana ba banana le ho tšehetsa malapa a ba hloakang ka lijo." Tabeng ea lenyalo la bana ba tlaase lilemong re nka likhato tsa molao, empa seo a se hlokomelang ke hore litaba tse ling metseng e hare-hare entse e le tloaelo ebile e se mohlolo ha ngoana a nyetsoe a le monyane.

O tsetsepele hore o ntse a se na ho khathala ho ema khahlanong le liketsahalo tsena, laha li baka bolutu kahar'a sechaba, le hore qetellong ba tla ba le sechaba se senang boikemelo le ho se tsebe ho etsa liqeto tse

ba khutlele likolo, kaha e le tokelo ea bona." Ke Rapapa eo.

'Musi oa Setereke sa Mokhotlong Kepa Qeke o itse o tsoenyehile haholo hobane kholo e ntle ea sechaba e bonahala ka thuto le sechaba se rutehileng, hore kamoso se tsebe ho etsa liqeto tse kholo bakeng sa naha. O re boemo bona bo'a nyarosa, kaha e le kobo anela ho kenyeletsa le lithekefetso tsa bana ka malapeng.

O re o tsoere ka matla ho bona hore mekhatlo le batho ba boithatelo bo botle ba anetsa thuto kahar'a metse le ho bacha, hore ba tsebe hore lenyalo la bana ba tlaase lilemong ke tloelo ea molao, ho etsa bana ba le tlaase lilemong ke ho itšenyetsa bokamoso le ho ema pele litoro tsa bona. H'a phethela o ipilelitse ho sechaba sohle sa habo ho



ema ka maoto ba tsoarane ka matsoho ho hlola kholo-lumo ena.

Mookameli oa Sepolesa Tlokoeng Senior Inspector Masoli Khoanyane o hlalositse hore litlaleho li 'maloa sepoleseng tsa tlhekefetso eabana ka malapeng, eo pelaelo e leng hore e susumetsoa ke tlhokahalo ea mesebetsi le bofuma ka malapeng. O re taba ena e tsamaellana 'moho le khiriso le tšebeliso empe ea bana ba bashanyana ba nyahlatsang sekolo ebe ba ea lisa.

O re ba tsoere ka thata, sechaba se tlaaha liketsahalo tse joalo ebe batsoali ba nkela likhato tsa molao. Hona le bana le batsoali ba Litsing tsa Tlhabollo ea Batsoaruoa ke liketso tsena. Tabeng ea bokhachane ba bana ba tlaase lilemong ke taba e teng le chobeliso e bonahalang e etsoa ho latela litloaelo tsa Basotho tsa khale. "Re se re namoletse bana ba 'maloa 'me ba khutletse likolong, ba tsoile kahar'a manyalo ha bao eleng bakhachane re bona hore likolo ha li ba qhelele ka thoko ba tsoelapele ka lithuto." Ke Senior Inspector Khoanyane eo.

O re ho hlola liketsahalo tsena ba fana ka lithupelo ho bacha le batsoali metseng, bakhethoa ba sechaba le mekhatlo e ikemetseng ho fahlolla sechaba, ho latela litlaleho tseo ba li fumanang hona joale, ke pontšo ea thuto e fihlang sechabeng, hobane litlaleho li theohile haholo kaha bekeng o fumanana hona le tlaleho e le 'ngoe kapa ho sena letho.

Ho sa le joalo, ho ea ka tlaleho ea World Vision International, ea sehlooho se reng Ntlafalo ea bacha ka thuto ea bokhachane bo sa reroang ea 2025 -2026 e supa hore 19% ea banana ba lilemo 15-19 Lesotho ba se ba kile ba ima kapa ba

qalile ho ba le bana.

Ho ea ka lipalo-palo tsa tlaleho ea UNFPA East and Southern Africa, ho bile le 94% ea bana ba hlahileng ho banana ba 1,000 ba lilemo tse 15-19, e leng e 'ngoe ea lipalo tse phahameng haholo tikolohong ea Afrika. Ka kakaretso Afrika e ka Boroa ho Sahara, hoo e ka bang 25% ea banana ba imang pele ba fihla lilemong tse 18.

Ho ea ka Mokhatlo oa Tšireletso le Polokeho ea Bana UNICEF Lesotho, 24% ea banana ba nyaloa kapa ba ima pele ho lilemo tse 18, hona ho susumetsa hore ba tlohele sekolo.

Leha ho le joalo, lipalo tsa morao-rao li bontša hore bothata bo ntse bo hola libakeng tse ling, 'me Qacha's Nek, ho tloha Pherekhong ho isa Phupjane 2025, 33% (162 ho 486) ea bakhachane e ne e le bacha ba lilemo tse 13-19.


Ho feta mona tlaleho ea 2024 ea Banka ea Lefatše e bitsoang "Women, Business and the Law 2024" e phatlalalitse hore linaha tse ntseng li thuthuha li tobane le tahlehelo e kholo ea moruo haeba li sa laola bothata ba boimana bo sa reroang.

Ho ea ka tlaleho ena, lipalo li bontša hore linaha tsena li ka lahlehela ke ho fihla ho 10% ea GDP ka selemo. Lefatšeng ka bophara, tahlehelo e ka fihla ho M9Trillione selemo le selemo. Ho feta mona 30% ea banana linaheng tse futsanehileng ba ima pele ho lilemo tse 18.

Kholo ea moruo e ka fokotseha ka 2%-3% ka selemo haeba bothata bo sa rarolloe. Tlaleho e hlalosa hore tahlehelo ena e bakoa ke hore banana ba bangata ba tlohela sekolo, ba sa fihlele mesebetsi e nang le moputso o phelisang, e leng se fokotsang bokhoni ba naha ba ho hlahisa chelete.



MOB Kidds Edutainment




Across

- 1 Phekola lesokolla, o hlatsoa popelo. (5,2,4)
- 5 Sefate se molora ka 'mala se sa besoeng, se melamafikeng hangata.(9)
- 8 E phekola ts'ilana baneng, bana ba sa ithusing hantle, le lefuba (6)
- 9 O folisa lefuba, manyooa baneng, maqeba a linoha (6,2,5)
- 10 Ea bapalang pele.(4)

Down

- 1 E phekola meno, maqeba a kantle le maqeba a linoha. (6)
- 2 Le phekola mofets'e oa matsoele, serame, liso le maqeba a ka ntle. (7,2,4)
- 3 O phekola meno, o hlatsoa mali o phekola manyonyo ka mpeng. (6,6)
- 4 Le phekola kankere ea molomo oa popelo le mokaola. (10)
- 6 Sefate se seputsoa ba molora oa lisu, makhasi a teng a matala bo boputsoa ba molora (6)
- 7 Ntlo ea banyalani ba bacha. (7)
- 9 E phekola nyooko likhomong, o hlatsoa mali, o laola tsoekere. (6)

Likarabo tsa Puzzle MOB 94-4630





TSA KEREKE

O amoheloa ka mofuthu

Tšeliso Thakholi

Mopapa Leo XIV o fihlile naheng ea Algeria ka la 13 'Mesa monongoaha leetong la hae la pele la bolisa tikolohong ea Afrika, ho tloha h'a khethoa ho ba mohlalami oa mofu Mopapa Francis ka Motšeanong ngoahola, moo a tlang ho etela linaha tsa Cameroon, Angola le Quatorial Guinea ho tloha ka la 13 ho isa la 23 'Mesa 2026.

Rabalumeli h'a fihla naheng ea Algeria o bile Motse-moholo Algiers moo a ileng a etela sefika sa bashoela-tumelo ntlong e tlalehoang e le e kholo ka ho fetisisa ea Mamoseleme lefatšeng ka bophara, 'me a bua le Maalgeria le balumeli ba Kereke e Katholike ho hlaha ka likanta tsohle tsa toropo ea Algiers.

H'a bua le likete-kete tsa batho tse bileng teng, tšebelsetse sechaba sa balumeli hore Morena Molimo o lakatsa khotso le phelisano e mofuthu lipakeng tsa batho bohle. "Phelisano ka khotso hae bolele feela hoba sieo ha lintoa, empa eo e leng sesupo sa toka, tlhompheho le seriti lefatšeng." A rialo.

Ka la 14 'Mesa Rabalumeli o tla etellapele Sehlabele se Halalelang sa 'Missa, ho qala lithakong tsa Hippo motseng oa Annaba e leng moo ho bolokiloeng lingoloa tsa khale tsa Mohalaleli Augustinus le lintho tsa khale tsa bohlokoa tsa bokriste ba Afrika bophirimela. Ketsahalo ena e hlaloso ke ba bang ba balumeli e tiilo ba tlhohonolofatso e kholo ho sechaba sa bakriste ho tla keteka le ho rapela 'moho le Rabalumeli Sehlabele sa 'Missa.

Ho ea ka ba bang ba

bakriste ona ke monyetla oa pele o sa tloaelehang ho Kereke eohle ea Algeria. "Re ba fokolang haholo empa ketelo ea Ntate ea Halalelang e re fa matla le maikutlo a phethehileng a bongoe ba Kereke e ka hohle Lefatšeng. Sena se etsa hore re ikutloe re le ntho e le 'ngoe." Ke bona bao.

Mopapa Leo XIV h'a furalla naha ea Algeria o tla leba Cameroon moo a tlang ho nka matsatsi a mararo metseng ea Yaounde, Douala le Bamenda, 'me a kopane le President Paul

lo sebokeng sa khotso sa sechaba se tšoaretsong Bamenda. A boele a kopane le baithuti le barupeli ba junifesithi.

Haele Angola Rabalumeli o tla etela ntl'oa ea likhutsana le lehae la maqheku le ho keteka mekete e 450 Motse-moholo Luanda. Athe naheng ea ho qetela eo a tlang ho e etela pele a menahana le mehlala, e tla ba Equatorial Guinea moo a tla kopana le boemeli ba meetlo, a etele sekolo sa Thuto ea Mahlale se reheletsoeng ka Mopapa Francis le ho etela litsing tsa tlhabollo



Bertheleny Biya oa naha eo le Babishopo ba Kereke e Katholike. O tla etela ntl'oa ea likhutsana le ho nka karo-

moo a tlang ho kopana le ho lumelisa batšoarua.

-ACI Afrika-

Thapelo ea Basotho

'Mopi, Hlahlamacholo, Ramaseli, Rammoloki Atla li maroba, Atla li marotholi a pula, Atla li tšoeu tsa Rammoloki, Li tšoeu ke ho bopa masea, Hobane bohle re 'mopo le mosebetsi oa matsoho a ona. Hlahlamacholo hlahla metsi o'a etse keleli ea sehla sa Mariha, Hobane ka keleli u nchafatsa lichaba teng, Lichaba li tsoang ho uena 'mopong, Li tlang ho boela ho uena meahong. Ba meolimeololo, ba lumang lingope ho theleha. Ntšang tšoeu le nehe 'Mopi le tle le bone ha 'Mopi o thaba, Hobane Baholo-Balimo bona ba thabela likhalapa. Ba re ho be ho soeu, ho be malola, Ho be hele-hele pele le morao. Ho iloe kae ke Bo-ntate-moholo le Bo-nkhono ho sa keng ho khutloa, Ho iloe ha sekoti ha se tlale. 'Maakane joo! Ka 'Mopi ra le bona.

'Mopi oa Ramosholu-shololo litsohali Bo-nkhono ke bana ba labalabela matlala. Matlala b'a bona ka'ng a anetse, b'a bona ka ho theha mekhanya liphatleng tsa bona. Malataliana-tselana ngoana Rae e moholo ke mang, pitsana ha e na khobe, le e 'ngoe ha e na khobe. Qhaqholla u re qiti! Moshanyan'a sankatana le kholumo-lumo. Ho iloe kae ke bo-Mmabana, ba ile masimong.

Ba siile masea ka liotloaneng. Liotloana tseo ha li hole li sireletse masea. Ka bona Bo-ntate-moholo le Bo-nkhono ba lutse ka shoalane mollong le litlohotloholoana tsa bona ba li etsetsa litšomo tse monate;

Bo-limo le Tselane ka ba ka utloa ha ba ba etsetsa lilotho tse monate; bo-mmenthele o hlotse baruti.

Leseli! Khanya!

2025-2026 SELEMO A

SONTAHA SA 3 SA PASEKA



Liketso 2:14.22-28

Pesalema 15

1Peterose 1:17-21

Luka 24:13-35



Khothatso

Barutuo ba Emmaus

Paseka ke nako ea tšepo, ea khothatso, ea matšeliso bakeng la mokriste e mong le e mong oa 'nete. Paseka e re hopotsa hore Kriste o hlotse lefu, 'me ke eena, rona ba mo latelang, re hlotse bobehle. Efela mokriste oa 'nete o tseba hore lefu la hae ke khoro eo a kenang ka eona bophelong bo bocha bo sa feleng, boo Molimo a mo lokiselitseng bona.

Molaetsa oa Moapostola Peterosi ho rona ke hore re bana ba Molimo, hobane moha o hae o moholo, Molimo o n'a romele Kriste ho rona hore e be ngoan'abo rona. Ka baka leo, re ka bitsa Molimo Ntat'a rona. Empa, ha re sa ntsane re le lefatšeng, re tšoaetse ho phela joaloka bana ba hae ba 'nete, ba tšepahalang, hobane Ntat'a rona ea mohau ke mohloli ea tla ahlola liketso tsa e mong le e mong ka toka, mohl'a lefu la hae.

Erekaha re fetohile bana ba Molimo, 'me ka Hlatsuo re entsoe majalefa a leholimo, re tšoaetse ho phela ka ho ea ka boemo bona ba rona bo phahameng. Re tšoaetse ho sala Kriste morao re sa le lefatšeng lena, ha re rata ho ba le eena 'musong o sa feleng oa leholimo.

Jesu Kriste ka sebe o ile a tiisa 'nete ena ka mokhoa o hlakileng, ha a ne a re: "Haeba mang le mang a rata ho ntatela, a itele, a inkele sefapano, a ntatele." (Mat, 16:24) Mantsoe ana ha bolele hore bophelo ba rona bo lokela ho bopeloa le mahloko feela, empa a bolela hore re tšoaetse ho khina litakatso tsa rona, hore re tle re se ke ra busoa ke tsona.

Bahalaleli ba bangata ba ile ba etsa joalo; bakriste ba bangata ba ntse ba etsa joalo le kajeno 'me ba ikutloa ba le lehlohonolo, ba thabile ho feta ba bang. Efela re bakriste ka lebitso feela, ke hore bakriste ba ileng ba hlatsuo empa ba sa ikhathatsang ho sala Kriste morao, ba ruileng haholo mona lefatšeng empa ba se nang khotso hobane ba batla maruo a mang a mangata ho feta. Ba batla chelete, ba batla boithabiso le boiketlo, ba batla matla a puso; empa khotso ea 'nete le thabo ea 'nete li ba balehela, hobane tsena tsohle tsa lefatše li ke ke tsa ba khotsofatso, ke masaoana fela a tla fela hammoho le bona, ka letsatsi la lefu la bona.

Athe, kamoo Moapostola Peterosi a re bolellang kateng, bakriste ba 'nete ba tseba hore re baeti mona lefatšeng. Re tseleng e eang hae, 'me mathata a tsela a ke ke a re lebatsa menate a sa feleng ea leholimo. Kriste o re eteletse pele ka mahloko a hae le ka lefu la hae; o re bontšitse tsela. Re se ke ra tšoha, hobane joaloka ka eena hammoho le eena le ka eena re tla hlola, 'me re tla tsoha bafung re kene letlotlong la hae. Evangeling ea kajeno, Jesu ka sebele o re khothaletsa ho mo sala morao joalo tseleng ea Kalvari, re tle re tsebe ho kena letlotlong la leholimo le eena.

Barutuo ba Emmaus ba ne ba lahile tšepo ka baka la hoo e neng eka ke tlhohelo ea Jesu. Ba ne ba hopola hore o ile a hlola ke lira ka Labohlano, 'me litaba tsa hae li felile; ha ho sa tla bua ka eena. Jesu, molisa ea molemo, o'a ba lata 'me o ba khutlisetsa tseleng e nepahetseng. O'a ba hlalose, 'me o'a re hlalose tsa rona, hore hoo e leng tlhohelo ea hae mahlong a batho e bile tlhohelo ea 'nete ea Molimo. Mesebetsi e meholo ea Paseka ke misteri ho rona, ke hore ke 'nete e fetang kutloiso ea rona. Litsela tsa Molimo ha se litsela tsa batho. Mehopollo ea Molimo ha se mehopollo ea batho.

Ha re tsamaea re le bang tseleng ea bophelo 'me re leka ho utloisisa seo re se bonang, mahloko a mangata, le lefu leo e leng qetello ea 'ona, re sitoa ho se utloisisa 'me re lahla tšepo. Litaba tsena ke tsa Morena Molimo 'me li hlola kelello tse fokolang tsa rona. Athe ha re tsamaea le Kriste 'me re mamela lithaloso tsa hae, re qala ho utloisisa morero oa Molimo holim'a rona. Ha re khathatsoe ke mahloko a lefatše, hobane re ithuta hore e ka khona re utloisoe bohloko, re tle re kene letlotlong la rona leholimong.

Ke eona ruri mesebetsi ea Paseka: lefu le tsoala bophelo, tlhohelo mahlong a batho ke tlhohelo ea Molimo, bohlanga ba batho ke bohlanga ba Molimo, Kalvari ke tsela ea leholimo.

A re rapeleng Morena Molimo hore mahlo a rona a tutubolohe joaloka a barutuo ba Emmaus, re tle re tsebe Kriste ea buang le rona tseleng 'me re be le thabo ea 'nete ke cheseho e tsoang ho eena, ho fihlela re honyella hae, letlotlong le sa feleng leo a re lokiselitseng lona.

Bahalaleli har'a Beke

20	'Mesa	Marian
21	'Mesa	Arator
22	'Mesa	Bicor
23	'Mesa	Felix
24	'Mesa	Mary Clopas
25	'Mesa	Mella

Limathi li thula thaba

Tšeliso Thakholi

Limathi tsa Naha ea Lesotho tse tsebahalang haholo tsa mabelo a mokoka, li khutletse hae li hoshola, tšiba ho lla tse ka mahafing, kamor'a ho hloloa ke likhalala tse tummeng haholo ho hlaha lefatšeng ka bophara, lebelong la banna le basali la Two Oceans, la bolelele ba 56Km le bileng Cape Town, Afrika Boroa ka Moqebelo oa la 11 'Mesa monongoaha, moo ho bileng le a le mong feela ea atlehileng ho hlaha kahar'a ba leshome ba tsoileng khoeleng pele.

Lebelo lena la selemo le selemo le bonahetse le bile boima haholo selemong sena, limathi tse ngata tsa Lesotho tse nang le boiphihlelo mabelong a machaba, tseo sechaba sa Basotho se neng se behile tšepo e kholo ho tsona joaloka Khoarahlane Seutloali eo e neng e le mohloli oa lebelo lena ngoahola, ntoa e hlile ea mohlola. Athe mokaubere oa mabelo a mokoka, Lebanya Nkoka, a ile a hlaha boemong ba bosupa ngoahola, lekhetlong lena o ile a

tsoa maemong a bo-20 ka nako ea 3:09:25.

Haele ka ho basali, Nengheng Khatala h'a sebetsa hantle, ngoahola o tsoile boemong ba boraro, lekhetlong lena ke eena feela ea ileng a phethela lebelo lena a le boemong ba borobeli ka nako ea 3:43:43, 'me a ikhapela chelete e kaalo ka M18,000.00. Le ha boholo ba limathi tsa Lesotho li atlehile ho qeta lebelo lena, li khutletse hae ho se meputso ea letho eo ba e fumaneng ka lebaka la mosebetsi oa bona o sa kang oa e ba motle.

Limathi tsa naha ea Afrika Boroa li ile tsa bontša boiphihlelo lebelong lena kaha libapali tse supileng ka ho banna le basali li ile tsa tsoa khoeleng pele, 'me ea nt'o ba Kenya, Lesotho le Zimbabwe ka semathi se le seng. Mohloli ka ho banna e bile semathi se secha haholo lebelong lena e leng Arthur Jantjies oa Afrika Boroa ka nako ea 3:09:25. Bobeling ea e-ba mohloli oa selemo sa 2024 e leng Onalenna Khonkhothe ka nako ea 3:10:00.

Maemong a boraro ea e-ba Blessing Waison oa

naha ea Zimbabwe ka nako ea 3:11:13 ea neng a hlile a behiloe merebele ke Dennis Kipkosgai oa Kenya ka nako ea 3:11:29, ea hlalileng boemong ba bone. Ka ho basali, mohloli e bile qhoku e seng e e-na le nalane ea ho hapa lebelo lena makhetlo a supileng ka tatellano e leng Gerda Steyn oa Afrika Boroa ka nako ea 3:27:43, bobeling ea eba semathi se tloaelehileng e leng Margaret Jepchumba oa Kenya

ka nako ea 3:33:31 ha borarong e bile Nobuhle Nobukhosi Tshuma oa Zimbabwe ka 3:38:34.

Bahloli lebelong lena ba ikhapetse chelete e kaalo ka M380,000.00 motho ka mong ka ho banna le basali, 'me morero e ne e le hore motho ea tla roba rekote ea hae ea selemo se fetileng o tlii'o nyetleletsoa M2.6Million, empa ha hona ea atlehileng ho etsa rekote e fetang ea ngoahola.



Haele lebelong la bolelele ba 21Km la banna le basali Basotho ha b'a hlaha ho hang ka ha boemong ba pele ho isa ho ba boraro ka ho banna ebile limathi tsa naha ea Zimbabwe e leng Felix Masai ea ileng a tsoa khoeleng pele, ka nako ea 1:3:17, bobeling le borarong ea eba Shadrack Musyoka ka nako ea 1:3:41 le Joshua Mengich ka nako ea 1:3:42. Ka ho basali mohloli ebile Lavinia Haitope oa Kenya ka nako ea 1:14:36, bobeling ea eba Fortunate Chidziwo oa Zimbabwe ka nako ea 1:16:29 le Emma Browne oa UK ka nako ea 1:18:9.

Ho tloha ka 1970 ha lebelo la Two Oceans le ne le qala, mohloli oa pele oa monna e bile Dirkie Steyn oa Afrika Boroa, ka nako ea 3:55:50 ha ka ho basali e bile Ulla Paul ka nako ea 5:14:50. Haele Mosotho oa pele oa ho hapa lebelo lena ka 1976 le 1979 ke Vicent Rakabaele oa Lesotho ka nako ea 3:8:56 ha lilemong tse na tsa morao-rao ka 2010 e bile Mabothile Lebopo ka nako ea 3:6:18. Lebopo o ile a lateloa ke Lebanya Nkoka ka 2014, ka 2015 ea eba Motlokoa Nkhabutlane ha oa ho qetela oa ho hapa lebelo lena e bile Khoarahlane Seutloali ka 2025.

Lioli ha e-s'o lahle liphethela

Tšeliso Thakholi

Mampoli oa lihlopha tsa Liki e Kholo ea Vodacom, Lioli 'Tse Nala', le ha e bonahala e ile ea khibela mafelong ana a sa tsoa feta a beke, ka ho hloloa ke Matlama ka thupa e bohloko ea 1-0, ha e-s'o lahle liphethela ho sireletsa mohope oa liki, kaha e ntse ena le tšepo ea ho kakasetsa mohope holimo hape ha lipapali li fihla pheletsong.

Tšepo ena ea Lioli e bontšitsoe ke batšehetsi ba eona kamor'a papali e bileng matla haholo lipakeng tsa eona le Matlama. Batšehetsi ba re ho latela ka moo ba boneng papali eo ea bona le Matlama, libapali tsa habo bona li ikemiselitse ho loana ea khumamela haele mona ho talinngoe khoeleng lipapaling tsa lihlopha tse kholo bolong ea maoto.

Ba re ha se patuo hore ba ile ba hloleha ho lekanya lintlha metsotsong ea ho qetela ea papali ka ho hloloa ho hlaba mokoko, le hoja bane ba se ba kapile mollo, empa seo e tla ba pale ea maobane ha ba tla be ba



hlabisa LDF ka lenaka fatše mafelong ana a beke, ha ba kopana le eona moketeng o moholo oa lipapali tsa liki o tlii'o ba ka lebaleng la Setsoto ka Moqebelo oa la 18 'Mesa monongoaha. Ba re libapali tsa bona li lumela hore li ka 'na tsa tšireletsa mohope oa bona.

"Re tla loana ea khumamela hore re hlole ka hohlehohle lipapali tse tharo tse re saletseng, re qala ka e khahlanong le LDF." Ba re ke amang a maikutlo a lipapali tsa bona kaha ba

bontša hore lipapali tsena tsa ho qetela li bohlokoa ho feta tsohle tseo ba kileng ba li bapala.

Ba re Lioli ha e ka hlola lipapali tsena tse tharo ba ka 'na ba boela ba hloella tsullung ea loko, 'me seo se tla etsa hore ba boele ba sireletse mohope ona ka katleho makhetlo a mane ka tatellano. Leha ho le joalo, batšehetsi ba boetse ba elelloa hore ho tla ba boima haholo ho hapa lipapali tse ba saletseng ntle le hore ba itokise ka matla a maholo

ho feta pele.

Leha tšepo ea hore bompoli bana ba bolo ea maoto Lesotho, ba ka tseba ho sireletsa mohope, ba boemong ba botšelela ka lintlha-kholo tse 45, 'me ha ba ka hapa lipapali tsa bona tse setseng ba tla be ba ena le 54. Athe sehlopha se ka holimo-limo lokong sa Lijabatho se na le lintlha-kholo tse 53, 'me ha se ka hapa lipapali tsohle tsa sona se tla be se a khetse 62 ka mokotleng. Lioli e ka fumana monyetla hafeela Lijabatho e ka lahlehela

ke lipapali tsohle tsa eona, e leng ntho e ke keng ea etsahala ha bonolo papaling ea bolo ea maoto.

Hajoale boemong ba pele ke Lijabatho ka 53, bobeling ke Bantu ka 51, kamor'a hore e hlole Manonyane ka 2-1 mafelong a sa tsoa feta a beke. Matlama e theohetse borarong ka 51, ha Lifofane e neng e le maemong a pele e theohetse maemong a bone ka 50. Bohlanong le botšela ke Majantja le Lioli ka 47 le 45 ka tatellano. Haele ka tlaase-tlaase ho liki maemong a bo 15 le 16 ke Members le Maroala ka 15 le 14 ka ho latellana, 'me le tsona ka lipapali tse na tse setseng li ntse li ena le monyetla o moholo oa ho baleha ho tla rathoa ke selepe ka Motšeanong ha liki e fela.

Ho feta mona, ka Moqebelo oa la 18 'Mesa, ke mokete o moholo oa lipapali tsa liki lebaleng la Setsoto, Maseru, moo li tlang ho bapala tjena: LDF vs Lioli, Linare vs Matlama, Bantu vs Liphakoe le Machokha vs Majantja. Ka Sontaha sa la 19 'Mesa, Maroala vs LMPS Ha Ratjomose, Members vs Lifofane ka LCS Ground, Manonyane vs LUFCl le Lijabatho vs LCS bobeli ba tsona ka Bambatha.



LTDC e matlafatsa bacha

Nthabeleng Seitlheko

Leha Naha ea Lesotho e kikitela litabeng tsa ho hohela bohahlauli le ho itsebahatsa Machabeng, LTDC ka tšebeliso le Limkokwing University of Creative Technology ka 'Faculty of Communication, Media and Broadcasting' (FCMB), e qalile koetliso ea matsatsi a mabeli e reretsoeng ho matlafatsa bacha ba 18 ba batlang ho ba baetsi ba litaba Seterekeng sa Qacha's Nek ka la 14 'Mesa monongoaha.

Koetliso ena e etsoa tlas'a lenaneo la Re Bontše Lesotho, 'me e tšehetsoa seterekeng ke Metropolitan Lesotho. Morero o moholo ke hore naha ea Lesotho e tsejoe ke lefatše lohle e le karolo ea khoheli ea bahahlauli, ho eteloa khafetsa le hore e tsebe ho nyoloha moruong oa eona.

Naha ea Lesotho ke e 'ngoe ea linaha tse nang le moea o pholileng o khahlang ba bangata 'moho le botseteli. Ka ho tsebahatsa naha marang-rang ho ka thusa kholong ea moruo, pokellong e matla ea lekhetho le ntlafalo ea Basotho.

Letsatsi la pele la koetliso le shebane le ho hlalosa hore 'content creation' ke eng, litšoanelo tsa baetsi ba litaba ba atlehileng, hammoho le

ho ruta barupeluo ka mekhoha ea ho etsa lipale tse matla tsa bohahlauli ka ho sebelisa 'photography', 'videography' le 'editing'.

Barupeluo ba 18 ba khethiloe ka tholisano e matla, moo ba neng ba lokela ho romela li 'video' tse bontšang thahasello, boikemisetsa le bokhoni ba bona ba ho etsa litaba.

H'a bua le bo-ralitaba, 'Head of Strategic Marketing' ho LTDC, Phomolo Lebotsa, o boletse hore sepheo sa lenaneo

ke ho fetola tsela eo Lesotho e bonoang ka eona marang-rang ka hore Basotho ka bo bona ba phehe lipale tsa bona.

O itse setšoantšo sa Lesotho marang-rang se lokela ho etsoa ke Basotho, haholo ka ho bontša lipale tse ntle le tsa 'nete tsa bohahlauli tse akarelletsang linoka, lithaba, lijo tsa setso le moaparo oa Basotho.

Lebotsa o boetse a re leha LTDC e na le boikarabello ba ho phahamisa naha tlas'a Lekala la Bohahlauli, Lipapali,

Bonono le Setso, tšebeliso 'moho le mekhatlo e meng e ntse e le ea bohlokoa haholo ho fihlela sepheo sena.

Lenaneo lena le nkoa e le mohato oa bohlokoa oa ho matlafatsa bacha hore e be karolo ea ho fetola setšoantšo sa Lesotho le ho phahamisa bohahlauli ka mokhoa oa sejoale-joale.

Letona la Bohahlauli, Bonono le Bochaba, Mohlomphehi Motlatsi Mapelepo, o re kholo ea moruo oa Lesotho e ka ntlafala haholo ha ho ka

phamoleloa litaba tsa bohahlauli holimo. A re ho ntlafatsa bacha le ho tšehetsa litoro tsa bona ho ba thusa hoba le boiphilelo kholo le ho tseba ka naha ea bo bona.

Ho bohlokoa hore Basotho ba tsebahatse naha ea ha bo bona machabeng eseng feela ka ho bonoa, empa ka ho eteloa hore batho bohle ba bone botle ba naha ena. A re seo ha se ntlafatse baeti feela empa bahoebi le litsebi tsa nalanane li bapala karolo e kholo.

SUBSCRIBE & BUY ONLINE!

Monongoaha re batla re qatsohile haholo ho tsa marang-rang. Fumana libuka tse na ho marang-rang a Akello Library

Prepare good People for The Lord

TIPS TO ACCESS

<https://library.akello.co/downloads>

Steps to Access our Books on Akello Online Library

1. Visit Akello Library: Go to (<https://www.akellolibrary.com/>) or download the app on the link provided above.
2. Sign Up/Log In: Register or log in with your account.
3. Search: Use the search bar to find 'Mazenod Book Centre' or specific book titles.
4. Select a Book: Click on the desired book to view details.
5. Borrow or Buy: Borrow free books or purchase premium ones as needed.
6. Read: Access the book online or download it for offline reading.

For issues, contact Mazenod Book Centre

WhatsApp: (+266) 57396597

LIFELA TSA BAKRISTE
MANTSOE

Ngoana Jesu oa Fraque
Ea mabane Mantsi

Piketho: S.C. Mantsi
LINOVENA

22 322 213 / 27 350 562

FOR MORE INFORMATION

maserubookcentre@gmail.com / bookcentre@mazenodprinting.co.ls